

UN CENTRO DI BARIO

*Un Centro di Bario no ta algo nobo den nos comunidad.
Kiko ta un Centro di Bario, ta un pregunta cu hopi hende no por contestá.
Den e artículo aki lo nos elaborá riba e tópico aki, pa asina nos por haya un mi-
hor bista riba Centronan di Bario y muy en particular, riba esun di nos mes.*

META DI UN CENTRO DI BARIO

E diferencia mas principal entre un Centro di Bario y un Club ta cu un Centro di Bario no conocé miembro. Tur hende ta bon-bini y en particular, esnan di e barío concerní. Un Centro di Bario ta un organizashon pa stimulá un desaroyo social den e barío. Cu esey nos kier men cu e habitantenan tin un bon contacto cu y comprension pa otro. Cu nan por cooperá cu otro.

Esaki ta trece unión den e barío, cu otro palabra, cu e habitantenan den un barío ta dispuesto pa compartí felicidad y tristeza cu otro, yuda otro unda tin mester.

Un Centro di Bario ta trata di logra esaki, dor di organizá actividadnan pa e habitantenan di e barío. E actividadnan ta estimulá e habitantenan pa nan tin mas contacto cu otro. Nan lo mester comprendé y cooperá cu otro pa realizá tal actividadnan.

ACTIVIDADNAN

E actividadnan ta worde organizá a base di e deseonan cu ta reina den e barío. Manera nos tur sa, den nos barío nos tin diferente gruponan di hende, p.e. gruponan di hobennan, adulto- y anciano- nan. Actividadnan lo por worde organizá pa cada grupo (a base di nan deseonan). Pero lógicamente cada persona tin su mes deseonan y p'e motibo ey nos ta haya diferente tipo di actividadnan.

Tin actividadnan a base di edad, p.e. Comishon di hubentud, mucha of anciano- nan. Ademas tin actividadnan a base di interes di e habitantenan, p.e. deporte, educashon, informashon cultural, etc.

Semper lo tin interesnan den e barío cu no a haya atenshon den e Centro di Bario, pero cualke habitante semper por acercá e miembronan di Directiva y tre-

ce su ideanan y/of deseonan dilanti.

E necesidadnan den un barío tambe ta un aspecto a base di cual un Centro di Bario ta organizá actividadnan. Si e lidernan den un barío, of e habitantenan mes ta sinti un necesidad, p.e. falta di informashon, Centro di Bario por organizá actividadnan pa eliminá tal falta. Den e caso di falta di informashon, nan por lanta un revista of organizá anochi- nan informativo.

No semper un Centro di Bario por yuda cu actividadnan a base di necesidad of deseo. Ta dependé hopi biaha di e facilidadnan (edificio) cu e Centro di Bario tin disponibel.

E PARTI FINANCIERO

Mayoria actividadnan di un Centro di Bario ta worde organizá den un edificio. Construcshon y mantenshon di un edificio awendia ta costa hopi placa. P'e motibo ey Centro di Bario mester organizá actividadnan pa crea fondo, p'asina traha of paga e gastonan. Hopi biaha nos ta tende hendenan bisa cu nos ta organizá actividadnan recreativo só manera fiesta of feria. Sinembargo, e idea aki ta eroneo, pa motibo cu e actividadnan aki ta haya hopi publicidad, pa asina por haya mas fondo pa otro actividadnan cu ta haya menos publicidad.

E gastonan di mantenshon ta hopi halto, pero ademas Centro di Barionan tambe mester paga e gastonan di e actividadnan cu nan ta organizá.

Un Centro di Bario no por hasi un ganashi grandi riba su actividadnan social, pasobra e ta un organisashon social y no comercial. Na Antiyas y tambe na Hulanda nos conocé algun fondonan cu ta yuda financieramente, pero solamente si e Centro mes tambe ta hasi esfuerzo pa cubri su gastonan.

BOLUNTARIONAN

Un Centro di Bario ta haya su boluntarionan for di e habitantenan di e barío mes. E boluntarionan lo mester yuda pa organizá actividadnan. Un boluntario ta traha di su propio boluntad y na favor di su barío. A base di e desaroyo cu e ta experienciá e por bira un lider den e barío. E por expresá e deseo y necesidadnan di e barío den e Centro, pero tambe pafor. E trabao di un boluntario no ta tur ora facil, pasobra e tin cu pone basta tempo disponibel pa e organizashonnan. E mester comprendé y traha a base di e opinionnan den e barío y no sigui su mes ideanan só. E mester por aceptá crítica y sigui traha cu mesun entusiasmo.

E persona cu kier aceptá e reto aki como boluntario ta logra un desaroyo personal cu e por usa den diferente otro situashonnan. Ta pesey tambe nos ta yama un boluntario asina, un lider. E por organizá a base di e deseonan y necesidadnan den e barío, actividadnan cu ta yuda e barío den su desaroyo.

NOS CENTRO DI BARIO PLAYA PABAO

Diferente personanan ta puntra pakiko nos Centro di Bario yama Playa Pabao.



Riba mapanan di gobierno na D.O.W., e parti di Playa cu nos ta considerá nos bario, ta worde yamá "Oranjestad West" y tradusí na Papiamentu esaki ta Playa Pabao.

Un otro remarka cu nos ta tende, esta cu "Ta ún Playa só tin í", ta exigí un splicashon.

Un Centro di Bario ta worde lantá den un comunidad unda mayoria di'e habitantenan conocé otro. E bario ta nan sitio conocí y unda nan ta sinti nan mes na cas.

Un bario ta un comunidad, den cual e habitantenan ta sinti nan mes parti di otro. Un habitante di Madiki lo no bisa lihé cu un persona cu ta biba na Klip ta biba den e mesun bario. Pero un persona cu ta biba na Socotoro sí lo bisa esey mas facil ora ta trata di Sta. Helena of Madiki.

PLAYA PABAO ta contené e siguiente barionan chikito:

Eagle, Rancho, Socotoro, Sta. Helena, Madiki, Paradijs, Bushiri, Pos Abao, Kunuku Abao y un parti di Ponton (te cu No. 100). Of di otro manera bisá: banda pabao di Boerhavestraat, Emmastraat Havenstraat, Weststraat, L.G. Smith Boulevard, despues Manshebu; Bushiri, Pos Abao y Ponton (te cu No. 100) y Boerhavestraat.

Directiva di Centro di Bario Playa Pabao ta consistí actualmente di 7 miembro, esta:

Lio Davelaar
Dennis Burke
Gisela Croes
Lelia Henriquez
Tolin Chirino
Bochi Maduro
Edwin Martinus

Presidente
Vice-Presidente
Secretaria
Tesorera
Comisario
Comisario
Comisario

E directiva ta reuní tur Dialuna na Franciscus College.

Poco-poco nos lo mester crece pa por organizá actividadnan riba tur nivel den nos bario. Actualmente tin 5 comishon ta funshoná caba, organizando actividadnan. Cada miembro di directiva ta coordinador di un Comishon, cu exepshon di e Presidente y e Tesorero.

E Comishonnan existente ta:

* Comishon di Damas
* Comishon di Hubentud
* Comishon di Educashon
* Comishon Crea Fondo
* Comishon di Deporte

Coordinadora : Gisela Croes
Coordinador : Dennis Burke
Coordinador : Tolin Chirino
Coordinador : Lio Davelaar
Coordinador : Bochi Maduro

Fuera di Comishonnan di actividad, nos Centro di Bario conocé Comishonnan di sosten, manera:

Comishon di Cushina y Comishon di Bar. E comishonnan aki mester percurá pa durante actividadnan tin e facilidad di cushina y/of bar.

Habitantenan cu ta interesá na yuda nan Centro di Bario di un of otro forma, por acercá un di e miembronan di Directiva ariba menshoná. Semper lo tin mester di hende pa yuda y un man nunca ta di mas.

ANOCI DI DESPEDIDA PA LUPITA GIL

Diabierne, 14 di Agosto último, Centro di Bario Playa Pabao a tene un anochi di despedida pa e stagère Señorita Lupita Gil, kende a regresá Hulanda pa terminá su estudio.

Tur e miembronan di'e diferente comishonnan tabata presente.

Principalmente e Comishon di Damas y esun di Hubentud lo sinti hopi falta di Lupita, kende e último año a traha duro na bienestar di e comishonnan aki.

Centro di Bario Playa Pabao ta deseá Lupita hopi éxito den su estudio y ta spera cu pronto nos lo por miré bek serca nos.



LAGA BO MENTE TRAHA

Despues di e éxito grandi di e her-sengymnastiek pa hubentud cu Comishon CHUPP a organizá den año 1980, nan ta sigui cu e actividad aki.

Año pasá e equipo di Shoconan di Santa Helena a bira campeón. Interesadonan por inscribí na Sint Franciscus College, tur Diarazon anochi pa 8'or.

Bo mester ta bibá den Playa Pabao y tin entre 14 pa 21 año di edad.

Nos ta hasi un yamada na tur hobennan pa participá na e actividad aki. No lubidá cu esaki ta salú pa bo mente.

BIN KIBRA BO CABEZ !

PRIJS: Fls. 2,00

nos REVISTA

AÑA 1 — NO. 1

OKTOBER 1981



TÓPICOS:

UN CENTRO DI BARIO

IMPORTANCIA DI DEPORTE PA BO SALUD

CLUB HOLLANDIA

PAPIAMENTO NA SKOL,... SI of NO ?

HAF DI CONTAINER

ENTREVISTA EXCLUSIVO CU GLENDA HEK,... STEWARDESS